

縣志

卷

拾陸

列傳

下上

文循
苑良

武鄉
勇賢

義仕
行績

隱孝
逸友

耆壽

流寓

方技

方外

漢川縣志卷十六

列傳志序

漢川陽郡屬邑耳內方小別蜿蜒於外富湏白澁潏洄於中壤地廣袤井里相望實楚之中縣也夫子曰十室之邑必有忠信況漢川山水靈奧冠蓋絡繹瑰異卓立之士堪垂不朽者故代有其人焉而郡志所載寥寥若晨星噫莫爲之後雖盛弗傳有美不彰非里中後起之責歟竊嘗承諸庭訓考稽竹素及身所見聞者採擇而叙述之凡傳循良惠愛也鄉賢崇德也仕績廷獻也孝友敦本也文苑實修也武勇錄功也義行氣誼也隱逸尚志也耆壽典型也流寓遺徽也方技雖小道藝成亦可用世方外雖緇流慧力深亦可悟道類萃區分爲二卷然則川故中縣其足以摩礪世俗有裨來茲未可與通都大邑相軒輊也作列傳

列傳上

循良

鄉賢

仕績

孝友

循良

宋

曹彥約字簡甫都昌人第進士孝宗時漢陽缺守檄軍事時金人大入郡兵素寡弱彥約訪土豪得許高高保趙觀黨仲昇等敵圍安陸遊騎闖漢川彥約授方畧擊

走以功進知漢陽軍

宋史

毛惠直字蒿老吉水人紹興進士選漢川令時掎克風熾惠直嘆曰媿民以自安去國以安民兩言決耳遂引疾上印綬去

江西志

胡良儒奉新人以漢川錄事參軍應詔論瑤華宮事有綠衣上僭之語崇甯初入黨籍五年詔收叙而卒

江西志

陳之祥江西人以進士爲漢川令強於學果於行能使爲之長者聽爲之民者思

王臨川集

况暹字鼎元上高人由舉人爲漢川令制行純潔文章典雅周旋禮儀俱可爲法

明一統志

漢川縣志

卷十六

列傳上 循良

二

元

許弼字賢甫益都人爲漢川令政教修明德行顯著民心悅服崇祀名宦

明一統志

楊觀江西上饒人至正初由翰林檢討宰漢川敦本務農輕徭薄賦修學講禮以造士去奸弭盜以安民政教修明案無畱牘崇祀名宦

明

張敬麗水人洪武初爲邑令招集流亡撫惠瘡痍邑屬經兵燹久而翕然稱治者敬之力也

林志稿

吳炬江西崇仁人明初由吏員官漢川縣丞撫民二載

練達世務以裁缺去百姓懷之

龔文煥四川新津人由國學任邑令課農桑均徭役卓然稱賢至今思之

盧蘭直隸昌黎人宣德間知川爲政清平聽訟明決有古循吏風居九年擢任去

游學直隸邢台人太學生由吏科給事調漢川剛勁有爲風行草偃豪橫股慄上下稱最

楊琚字朝用泰和人景泰中湖廣叅議撫治荆襄築老龍隄疏漢川竹筒河及創劉家壩雷家均諸要地川人

德之

陶志

漢川縣志

卷十六

列傳上 循良

三

陳惠浙江鄞縣人正統初由翰林出宰漢川疏陳利害多所補益勸農興學士民賴之崇祀名宦

陳志

陳德江西新淦人成化間由舉人至川修理學校疏築塘堰政聲甚著闔邑慕之

林堪字雲卿福建莆田人成化中由進士令漢川純厚近民廉介不苟暇與諸生講誨窮日夕不倦後升南京太僕寺丞民爲立去思碑祀名宦

省志

周正蕃福建長樂舉人正德初任漢川邑弊方劇蕃極力稽查修葺文廟置譙樓劉家壩行署府館一一可述昌應會字廷英閩縣人嘉靖中由舉人令漢川邑歲被

渰沒民不聊生乃極意拊循輕徭緩賦時羣盜聚夜劫民舍聞之卽往驅逐截其耳去已得盜盡殺之景王出封安陸奏討莊田濫及漢川中璫暴橫倍索會固持之璫怒昌強項逮繫按察司獄累月當道承景府意坐調去祀名宦

明一統志

詹大倫四川綿竹人由恩貢知縣事爲政有體士民德之有惠政碑記
安其善貴州普定衛舉人知漢川時潞藩奏計額糧三千民苦於輸納極凋弊善以其狀聞院司推官葉修請以衡州解故景藩倉糧抵補始得息肩蕭良有爲文記

漢川縣志

卷十六

列傳上 循良

四

之詳藝文

范士林四川宜賓舉人萬曆二十九年蒞川訝邑徵糧無法創立易知單以冬春夏秋按季照單自納民稱便操守廉潔尤畱意隄院後擢承天郡丞行李蕭然
桂生枝字九佺江西貴溪人由舉人視邑事未彌月百廢俱舉尤重學校見堂廡湫隘捐俸倡修邑孔道六出歲苦水災逋賦盈籍盜賊遍野民不堪命生枝一一御之有則士民德之祀名宦

彭大科號媿名分宜人萬曆丁酉舉人知漢川事劉家壩巨鎮也商賈絡繹歲額商稅八百金協濟潞府癸丑

河淤舟楫不通而稅應歲徵塌民苦之大科力爲陳請
得罷其稅撫按交薦陞北城兵馬司

江西人物志

張大治字望平保縣貢士天啟間令漢川始至侗然若
無能奸胥健訟輩多欺之越月悉得其姓氏始歷數其
奸狀各置諸法人皆以爲神君後卒於官僅餘帛數尺
祀名宦

李時旻字本仁臨川人由舉人授漢川令潔己愛民時
寇蹂荆襄距縣僅再宿無城可守爲立礮墩設柵架守
禦有方賊不敢犯乃建議築城遂爲巖邑疾亟請歸楚

中祀名宦

江西志

漢川縣志

卷十六

列傳上 循良

五

孫光祚字懷龍石屏州舉人崇禎間令漢川獻賊犯劉
家壩率眾直前抵楊子港與賊戰賊走鯉魚灘乘其半
渡擊之賊溺死者甚眾自是不敢復犯爲之歌曰金應
城銀孝感獨有無城縣隔水不相見蓋邑舊無城池祚
請於上築城七里有奇壬午左兵南奔逼城下七日始
去殺戮酷於賊民賴城以全陞蘄州知州祀名宦

陳志

張魁字萬選江西新淦人由舉人教諭漢川學優才瞻
善於訓迪歷升監察御史

陳志

祝惟敬德興舉人任漢川教諭課士頗嚴捐俸建敬一
亭後升黎平郡推官又寄俸建接官亭故址猶存

周化字蒼麓應城歲貢教諭漢川修葺學宮與諸生講論經藝暇則詠歌自適有濂溪之風祀名宦

吳宗周懷甯進士授漢陽推官嘉靖中景藩索稅於劉家壩宗周阻之獲譴明史

劉慤字致卿萬安人嘉靖進士巡撫湖北革元祐宮莊田奪其租備歲築漢隄之費歲大饑募夫浚漢川竹筒河七處水洩而地可耕役夫仰給於官所全活數萬人尋以大理寺卿擢工部侍郎卒

竇于儺字淮南合肥進士萬曆中督學三楚作育人才諸生懷之川邑學基舊爲居民所漁檄縣清復並捐學

漢川縣志

卷十六

列傳上 循良

六

田以奉俎豆川人立祠於學左祀之

葉修字克慎南昌進士以文章重於世萬曆時任漢陽府司理性剛直不阿常面折人過藩臬皆憚之漢川田賦爲潞藩奏割三之一民甚苦之修查衡州有歲額解德安倉者申允院司移抵漢川民祠祀焉氏姓譜

傅德堅四川新甯進士知漢川縣事潔己愛民有賢能聲崇禎癸未流賊陷縣城闔門殉難四川志

國朝

冀應熊字渭公河南輝縣人順治中以舉人知縣事有文武才邑西北松湖橫湖等處延袤百里蘆葦彌望夙

爲盜藪應熊計擒法勦殄滅能以催科寓撫字小民不聞追呼聲更勤於課士講論精詳邑中文風大振皆應能作興之力也歷升四川成都知府祀名宦陶志

陳吳嶽浙江慈谿進士康熙四十二年宰漢川蒞任七載重民教士政績上聞行取主事解組後士民感其德設筵祖餞盈衢巷泣送者不絕

梅琮貴州安順人康熙四十八年由舉人視邑事政簡刑清懋績丕著治川六載民無間言內轉刑部主事行

李蕭然

丁翊壽浙江長壽舉人康熙五十二年令漢川治政勤

漢川縣志

卷十六

列傳上

循良

七

敏有古循良風至今稱之

雷之瑜字少佩清河令奇之子由沔州附生任漢川訓導改主簿雍正三年引見條奏四事稱 旨詢以民間疾苦復奏對聲如洪鐘當超授遵化知州未幾擢知府轉雲南迤西道布政司叅議所至俱有聲子棟由漢川生員籍任巴州知州正歷任涼州知府孫世銓知歸安縣貌皆奇偉

林志稿

慕泰生浙江仁和進士雍正十年治川兩次操守清明人莫敢干以私士民德之

蘇岱直隸任邱人雍正十二年以貢士知縣事歷任六

載勤慎愛民卓然稱賢

譚元亮字擬陶景陵人由恩貢任邑教諭時兵燹之餘
士氣不振亮修葺學廡教育諸生周其困乏貧不能給
者衣食之性倜儻豁達有遠識年六十二一日具衣冠
沐浴召家人訓迪畢端坐而逝以子篆貴贈翰林檢討
梅奕廷廣濟人倜儻有氣節以歲貢任邑教諭每月朔
聚生徒於明倫堂講學士有單寒者試期並助以資斧
後以外艱去

林志稿

張道南福建晉江舉人乾隆二十四年任邑令吏事敏練
有神君稱而宅心平恕多所矜全每公庭對簿諄諄如

漢川縣志

卷十六

列傳上 循良

八

家人父子相告語卽身受重創者亦無不感泣而去讞
語朝下口碑暮鐫本經術以爲吏治卓然有古循良風

林志稿

伍澤概湖南祁陽舉人乾隆二十三年任邑令姚公山
下舊有令尹子文祠墓祠久圯墓莫攷澤慨爲修復其
墓碑表焉紫陽書院毀捐俸新之集生童肄業其中公
餘親與講貫表章先賢振興才俊雅化和氣士論翕然
歸之

林志稿

管紹裘乾隆末任小里潭巡檢清理地方宵小斂跡督
修隄防不辭勞瘁至今民思其惠政

榆樓叢考

樊鍾英雲南楚雄選貢嘉慶二十二年任邑令地苦窪
下澇害頻仍甫下車卽講求地方利弊每建議疏築擘
畫久遠前令詳辦淤陞科額過溢英謂居民瘠苦正賦
多難輸納何堪此重累繕稟力陳爲民請命不減元道
州春陵行詩當時雖未果行數年後大吏卒據以入告
題覆准減免十之七受其惠者至今飲食必祝焉林志稿

林萬年福清舉人嘉慶時試用湖北奉檄清丈邑之淤

田嚴馭隸卒絲毫無擾其湖淤未成之田減除新增民
賦無算士民頌其德林志稿

詹應甲字湘亭江蘇吳縣舉人嘉慶時蒞任愛民好士
邑人稱頌不忘

漢川縣志

卷十六

列傳上

循良

九

曠成春號琴仙江西吉安府永新縣舉人道光八年宰
川撫字勤勞聽斷明允督修隄工不辭况瘁嘗言做一
日官必期盡一日心先其急者勵精圖治期於百廢俱
修尤篤意培植士林思取歷代文獻極力表章恆以邑
乘未修賓興未儲爲恨邑向無考棚成春割清俸置買
基地於伏龍山下將率邑人次第創舉之值辛卯歲大
稔以徙任去未果士民思之

趙德轍號靜山山西解州進士道光十七年知縣事才
具優裕遇事勤能甫下車詢民疾若周歷隄防凡修築

防護無寒暑皆躬詣督率之工竣令沿隄積土牛以防盛漲植蘆葦以禦衝擊仿河工法也民稱便焉邑賦額有蘆稞銀例止壓徵頻年水災蘆洲多沉塌民苦虛賠德轍宛轉請於上官報可由是值災荒之年得與一律蠲緩尤善於勘斷民無株連累人稱趙青天歷官至江蘇巡撫

李恂字謹齋安徽鳳陽舉人道光十九年任漢川督理隄防不辭勞瘁辛丑歲祲調停賑恤民沾實惠鮮流殍劉仲字次山號石亭涼州武威人道光十六年官邑典史奉檄防隄汛理賑恤皆有聲譽其去也邑人合詞爲立善政碑周鏞記之

漢川縣志

卷十六

列傳上 循良

十

張書麟字鳳友江西彭澤人道光二十三年由優貢任邑令政務與民休息能以催科寓撫字苟纖毫有不便於民割俸墊賠雖見忤於上官罔恤也遇事明敏凡讞語申文告諭皆手自剖決若燭照之無遺翕然稱神君一時猾蠹屏息鮮訟獄羅廉訪遵殿亟稱之曰縣官若張令者雖古循良吏何加焉時論韙之邑本澤國歲無常稔書麟在任四五載雨暘時若隄垸無潰潰之虞百姓如登春臺莫不謂賢令尹和氣之所召致也爲人淡泊平易學有本原公餘惟博覽載籍故洞悉民隱情僞

立判以卓異徙任去邑人士無賢愚咸惘然若失慈父母云

鄉賢

元

黃元吉字文卿以德行文學教授鄉里士風丕變後至正時從祀鄉賢

府志

岳子忠字恕庵號晴川工詩古文詞以薦官本邑教諭訓迪有方士風丕振後以病乞休卒年六十有九祀名宦

明

漢川縣志

卷十六

列傳上

鄉賢

十一

卜仲銘字仲達持躬淳潔立品端方篤行孝友以耆民知本縣事人莫敢干以私卓有循聲永樂間從祀鄉賢

府志

陳傑譜名世傑字彥卿號俊章洪武府學生除戶部主事擢吏部驗封司員外永樂五年調北吏部員外歷官江西右叅議明敏廉介歷任皆著治績從祀鄉賢

尹晉本姓林字德菴永樂年領府學歲貢起家長壽縣知縣擢江南道御史彈劾不避權貴人多憚之出爲浙江叅議禦倭有功定海立祠祀之從祀應天府名宦祠生平篤於行誼創置義宅祭田有范文正風鄉里重焉

卒年七十有二

按黃金明功臣錄省志俱載有公傳

何英字芸閣性端謹造次必依禮法官肅甯教諭勤於訓迪士風丕振成化時從祀鄉賢府志

岳從義字宜齋由歲貢任南京戶部主事立朝端方奉勅刊定天下賦役全書蠲除無名浮派數百萬海內德之旋命督修宮殿採辦皇木舟覆溺水死賜諭祭

龍章字天寵少有文名舉正德庚午鄉試除鄢陵縣令調樂昌有惠政昌民立祠祀之後擢廣州通判亦有聲崇禎時從祀鄉賢府志

漢川縣志

卷十六

列傳上 鄉賢

十二

尹大本本姓林字蒲山一字伯中嘉靖辛卯與里中郭綸同舉於鄉士林有雙鳳之目初仕江西廣信推官改藩府長史晉四川叙州府同知歷官瑞州知府宦績懋著疊膺薦剡迄以耿介不合時宜棄職終養歸大本學問宏深善爲金石之文後進師之執經者盈門牆旣歸田清操自矢鄉人爭以望見道履爲榮訓飭子弟依法則家族以功名彰赫如弟姪大德若企輩皆大本所督成也朱志稱端慤醇謹有古人風所著有蒲山集餘載府志

龍大川字雲江歲貢生父章任鄢陵縣令大川性聰穎

弱冠補弟子員食餼父早背事母至孝處兄弟最友愛
生平學問宏通風致瀟灑朱侍御見而奇之曰龍天寵
英雄猶在蓋嘉其爲肖子也惜數奇不偶惟寄興琴書
享年七十卒祭酒蕭良有誌其墓子三次子襄仕慶府
長史但祀鄉賢

張緒字無意一字文綸初名劉燧嘉靖庚子舉人志意
高遠毅然以正學自任從鄒守益耿定向遊二公器重
之時江陵柄國緒與同榜不少屈嘗責以伊周大業逆
弗顧歷官南吏部員外與天台近溪見羅輩講學不輟
當路忌之謫繁昌諭移令德陽甫一載告歸教授生徒

漢川縣志

卷十六

列傳上

鄉賢

十三

蕭然四壁學者稱之曰甌山先生焦太史竝爲誌其墓

祀鄉賢

府志

王一善字德孺諸生性孝謹侍二親菽水承歡甘貧養
志泊如也生平介石自守栖隱衡門足不履城市而慷
慨好施無倦容初就省試拾徐商遺金急返諸商商願
割半以酬一善不可商感泣拜禱去里老有張汝爵乏
嗣求婢爲妾一善揮金贈婢張祀賴以不絕凡所爲每
多隱德里中藉以爲太邱以孫道直貴贈通議大夫崇
禎間祀鄉賢

林若企字虹橋九歲籍諸生舉隆慶年拔貢萬曆癸酉

舉人爲文取法先正錚錚有聲王道直岳東瞻賴其造就甚深初仕教諭升簡州知州簡故衝地民復疲玩若企居官五載興利除害而鹽井懸牌里戶給單其最著者秩滿除江西建昌府同知以疾乞休士民懷頌祀名宦逾年起知府未就晉中順大夫賜四品服萬曆間偕周少保嘉謨建立都中會館以息公車至今是賴他若修理學宮岳祠其功尤鉅歸田二十餘載棋酒寄興不廢吟咏所居五雲樓占山水之勝人咸以魯靈光稱之卒年八十有四著有五雲樓集餘詳府陶志列傳

龍襄字成吾號德贊學有淵源萬曆乙酉舉於鄉歷墊江大昌縣尹新化州守升慶府長史所在興利剔弊除莠安良有古循吏風鄉居多善行而以德安安陸倉米極力請抵吾邑兌軍等賦銀四千餘兩人尤德之崇禎十五年祀鄉賢

龍裳字載吾少工文貢入太學邑舊苦賦重裳倡義請於當事得從減嘗捐修儒學臺閣賑饑掩骼鄉里推爲長者以子納箴納銘貴贈奉直大夫志府順治十五年祀鄉賢

周嘉謨字明卿號敬松祖岳仕漢川廣文因著籍焉嘉靖甲子嘉謨入試邑人有中傷之者知縣吳文華奇其

文曰是國器也拔第一由縣庠中隆慶丁卯鄉試辛未登進士除戶部主事出守韶州備兵瀘州累司藩臬尋撫滇總督兩粵所至弭叛盜減礦稅戢璫威轉南司農北司空晉掌銓衡光宗崩與楊漣等受顧命當選侍移宮議起逆璫借端誣陷楊左諸賢幾及於禍懷宗立誅羣奸復起南冢宰旋請老歸年八十四卒賜祭葬贈少保生平丰采嚴毅文章樸茂典重流傳十五奏疏皆光熹時所奏也讀者猶想見立朝風節云著有採真園集綸音屢錫全錄蜀政紀畧滇粵奏議披瀝疏稿墨池清紀餘清圖年譜省度質言滄浪草俱與本傳見藝文祀鄉賢

漢川縣志

卷十六

列傳上 鄉賢

十五

王道直字履之又字孺初天啟壬戌進士授保定推官郡守欲建璫祠道直持不可擢御史巡按江南陛辭曰疏逆黨霍維華等巧借邊材陰圖翻案宜嚴邪正之防厘剝復之介以安國家當時蘇松被水請停織造及減折色條編十之五悉見嘉納晉都察院右副都御史提督操江會流寇數十部自豫楚來窺鳳陽瞰金陵犯安廬道直勵將士分據采石小孤諸要害屢拒卻之召拜兵部右侍郎書名御屏列枚卜而卒沮於權倖遂謝病歸父母繼逝素冠終其身尋卒道直生平與文震孟姚希孟倪元璐黃道周等交甚深於人材世道素共講求

然不肯倚附清流標榜門戶卽嘗忤奸輔溫體仁及拂周延儒而亦無矯飾之名世固莫能窺其涯際焉從祀鄉賢著有中已禁臺奏議吳會疏草嚴關盾墨江流瀟赤風紀澄清諸書行世載藝文志

府志曰周少保嘉謨王都憲道直皆前明社稷重臣今王都憲於康熙十四年置主入祠而周少保竟不預俎豆之列殊爲闕典又張甌山緒祀漢陽府庠而漢川本邑竟無名亦爲闕畧今依通志改正

魏闕字明閔世居邑之劉家驛少負奇姿讀書十行俱下早餼邑庠丙子以邑遭兵燹徙居龍耳崗精於易會通理數諸家於京房王弼之學靡不研究張中丞朝珍推重之創清風書院延闕主講席從遊者甚眾學者稱爲清風處士著有周易講義元代鑑統焦氏易林解清風處士詩古文集載藝文志

國朝

龍納銘字熙載順治己丑進士與兄納箴俱以文章名初任威縣令矜訟弭災興學勸士治術昭著以報最厯擢戶部主事山西司郎中出守都勻承凋敝之後逋欠難應納銘捐貲代完民困以蘇他如調劑驛遞安□營兵凡關郡治靡不竭盡心力以年老告歸兵民泣送有

至二三百里者康熙間祀鄉賢著有質思齋詩古文集
嘆苗吟榆收記梅花百吟載藝文志納箴歲貢生崇禎
庚辰特賜進士任甯國府同知亦有聲並祀鄉賢

顧膺歷字開明邑諸生侍御如華之父種學積文於經
史皆有論著最嗜蒙莊之學生平內行修飭事兩尊人
及其伯兄備極孝敬嘗手一編親沒廬墓終喪設義田
以敦族死喪必收饑荒必恤又推恩以及里黨時論多
之以子如華貴贈如其官順治十七年祀鄉賢

林志稿

汪時泰字敕菴一字祝峯順治八年舉人辛丑成進士
授儀徵知縣儀徵有曉船之役取給於民時泰設法庀

漢川縣志

卷十六

列傳上 鄉賢

十七

其事而民不擾條陳便宜十二端於大吏其役遂除民
田爲江水嚙坍賦無所出時泰爲請於大吏得免其他
惠政甚多生平工制舉業居官不廢書善衡文分校鄉
闈得錢世燾金玉相江同淇王黃立皆名宿也以父憂
將歸值飛蝗蔽空時泰就衰絰中呼天爲民請命不移
時蝗皆飛渡江去去官日囊篋蕭然著有來鶴亭編南

遊草柳塢集

林志稿餘載儀徵縣志

汪特昌字于岡學問淹雅以舉人官沅江教諭遷岳州
府教授所至勤於考迪士風丕變著鶴陰亭集頗有理
解可取觀其鄉聚紀火隕防紀水空齋紀竊命有無諸

篇中言屢獲天幸深爲可懼亦可謂不敢驕逸者矣康

熙間祀鄉賢又著有史論二卷滇遊紀勝一卷

章學誠省志稿

論曰吾聞汪氏一門何多賢哉及讀府志傳茶陵學

正祀鄉賢汪公定昌獨闕當時豈有逸焉間嘗訪其

宅墓搜求文童事蹟長老罕能道其詳蓋清門之零

落也久矣吁可慨也容當覓茶陵州志考之

周學顏字希賢生而端慤醇樸有古人風司鐸郢都日

與諸生講論孜孜不倦士風丕變其寄子書並囑其勉

行盛德事勿爲不義以忝所生弗愧濂溪家風焉後祀

鄉賢

漢川縣志

卷十六

列傳上

鄉賢

十八

林氏諱正紀字協五號耐閒國學生舉鄉飲居邑之兆

仙嶺幼聰穎通曉物理人世賢否邪正寓目卽知善讀

書熟於史慨然思有所見於世而舉場蹭蹬才末由試

於古人提躬訓家之法率行不怠林氏自侍御諱晉肇

基禮義代傳俗流失古法漸替耐閒以卓行爲宗黨所

推服主持家政申明約束擴修先祠以協禮制而譜系

重續飲福掃墓養老諸典靡不舉行進退揖讓煌煌乎

萬石君家風也萃子弟之秀者於宗祠設文會以裁成

之曲成材藝甚眾生平拯人於急難遠近德之少工詩

抒寫性靈年旣老律益細篇什盈卷爲人行在敦倫負

物望三四十一年型仁講讓一家化之鄉黨又化之風規
至今凜然卒年六十有三黃岡萬年茂爲立傳子二長
德仁次諱德義皆另有傳

林志稿

秦篤輝字山子號榆村歲貢生風裁整峻抱負宏深幼
孤事母至孝因善醫性慷慨樂施與每當歲暮里黨赤
貧者量加周卹親故婚喪大事力乏者必竭力相濟肄
業江漢書院時獨力捐梓書院志畧院師陳愚谷曰貧
士爲此可謂有志興學者矣長年一氊坐讀世俗罕識
其面遇不平事必正容莊論以期協情當理從無依違
試輒冠軍學有心得以慎獨爲宗著墨緣館集三十二

漢川縣志

卷十六

列傳上 鄉賢

十九

種其易象通義經學質疑錄警書平書等編尤足輔翼
經傳有功聖學引掖後進多所成就先以正心術爲教
自號信天翁懷清履潔無計功謀利之私學使契重者
多名德如賀蔗農吳澹齋方鍊君延聘主講衡文禮數
甚優郡邑夏幹園太守曠琴仙大令咸以不得一見爲
憾卒後夏太守叙其詩捐貲付梓子三本祖本徵俱庠
生本支出繼篤敬

仕績

明

胡灝字希梁歲貢生洪武間任國子監助教學有本源

立教以伊洛爲宗擢翰林檢討卒於官祀鄉賢

胡敬字信菴永樂進士累官至浙江道御史丰采嚴毅遇事敢言人莫敢干以私以病致仕卒

王諫字蓋臣少穎異工詩由舉人歷官至御史直言敢諫有古良臣風出爲湖州知府循聲卓著致仕歸著有青陽集載藝文志

段溥有文名以宏治癸卯舉人歷官崇慶府爲政有體如興學校振凋敝凡關郡治輒檄州縣舉行崇人德之致仕歸行李蕭然

林瑄字廷珪幼聰穎博涉經史成化年歲貢授河南杞

漢川縣志

卷十六

列傳上

仕績

二十

縣知縣明憲典恥阿縱引病歸田足不履城市築書室於湖上嘯傲觴咏樂其天年年七十有三卒

成實字什皆倜儻有氣節以成化進士累官禮科給事中明敏廉介彈劾不避權貴循聲藉甚未幾卒於官
段豸正德年歲貢生累官給事中以彈劾權要出爲通州牧亦有廉能聲謝病歸

陳鏞字邦儀籍諸生以例入監考授河南光州判善決疑獄所全實多光人頌之歷官陳州通判南京工部營繕所正告歸樂行善事焚貸券恤孤寡賑困窮甲辰歲飢斗米千錢民多流殍鏞出粟二千石賑之全活尤眾

林大韶字長川爲文有法度以嘉靖選貢任西城兵馬副指揮盜竊官庫祭品經年不獲大韶偵得之世廟獎之以玉杯賜焉擢知和曲州循聲藉藉解組後與弟大本敦篤宗誼子若人字新沙清介自高文學書法兼擅其長

尹良任字志伊張池口人隆慶辛未進士授龍川知縣討平積寇李九標張惟遠等以功賜金幣調劇丹陽人莫敢干以私召拜浙江道御史侍經筵條上治河諸封事深見嘉納巡按河東督理鹽政奏濬大小二池商民均便以疾告歸卒著有懷玉堂集載藝文志子際盛字輔運以諸生入監好談兵改授指揮使

林大道字只山與兄大有弟大德同貢成均授江西廣信府訓導卒後廣人感其德教請祀名宦著有悟言及釋訓藏於家以子若企官同知贈如其官大德字小泐質樸嗜學博通經籍任江西吉水訓導勤考課端士習名臣鄒元標葉向高皆出其門秩滿膺特薦擢興國知縣撫按舉爲廉平第一餘詳府志列傳子若介字龍池官應天訓導若全字鳳池官臨安府教授時人以雙桂稱之

尹應元字乾泰一字春寰萬曆甲戌進士授清豐知縣有廉能聲遷刑部主事歷員外郎中出知鳳陽府內艱服闋起補大名改真定三典畿輔劇郡應元游刃裕如事無遺誤累遷山東叅政備兵甯夏當哮氏逆亂之後皆視爲畏途應元諳韜畧洞邊情內撫將校外嚴守衛士無不願爲用者以功加按察使晉僉都御史巡撫山東時倭陷朝鮮大發兵往救應元轉餉調師未嘗乏太監陳增以礦稅橫東方誣陷益都知縣吳宗堯應元具奏劾增宗堯被逮增將縱黨肆辱以泄其憤應元極力保護宗堯竟得免清議躋之丁繼母憂起撫浙江謝事

漢川縣志

卷十六

列傳上

仕績

二十二

歸家居二十年卒著有撫浙奏疏栩栩園集尹乾泰集載藝文志子賓商另有傳

李時暢萬曆辛卯舉人除臨湘教諭折節待士捐俸建學宮卒於官

陶志

陳天衢字本亨號維河家本素豐性純樸嗜學以郡庠生入國學考授鄆縣簿旋知灌縣事建大禹橋修堯堰除巨盜王秋子擒奸民劉根得三年乞休歸不名一錢百姓立碑以紀其惠政壽八十卒

郭鉉字實吾起家明經爲太昌司訓改昆陽以才守兼優擢升佐令晉祿勸知州先是祿勸屢經兵燹流移未

復瘡痍未起荒蕪未闢反側未安皇皇岌岌盤錯極矣
鎡以通才偉抱迎刃而解未期月諸艱卽叙減官租寬
催科清獄訟息盜賊出民塗炭登之衽席歌舞載道雖
仙吏神君不啻也邑西有蟠龍橋通郡道久圯行旅病
涉乃修之費甚鉅民間子來不日成功車馬往來齊驅
並駕其堅固若鉛鎔而鍊爲之骨乃頌之曰天有意兮
地有靈賜使君兮仁且明橋之貞兮水之清正我德兮
厚我生何以祝之壽而甯子孫億萬雲且初郡人楊春
震碑紀其事會將遷去民走台畱之至三四不可得乃
泣而送之

檀萃 祿勸州志

漢川縣志

卷十六

列傳上

仕績

二十三

尹心周字郁文性曠達以歲貢任常州通判升廣安知
州遷靖江王府長史晉四品階政務與民休息囊篋蕭
然沒之日家無餘貲人皆嘆其清節云

殷時中字虛白以選貢入監聲噪南雍除定南知縣遷
廣東化州知州潔己愛民檄署海防同知海賈饋珠峻
卻之後以病致仕

國朝

顧如華字質夫號西巘順治己丑成進士除廣平知縣
奸民造僞印前官捕急逃入山東榆林引賊犯大名順
德及縣境如華旣備守具開門盡納難民探知賊巢榆

林接於黃河窪下窟領馬步鄉勇決河上流灌之賊死者無算乃出乞撫癸巳夏漳水泛溢肥鄉成安諸縣浸沒廣平先已培隄得無患丁酉擢御史廣平人生祀之糾濫委奏銷算復教職都御史龔鼎孳稱爲眞御史辛丑巡按四川朝議裁巡方官召還康熙丙午出爲浙江叅議未赴疾作著病中移心集明年卒如華與華亭沈麟有布衣之交當巡江浙鹽政下車先造其門遂與麟及學士吳偉業飲月虎印歌詠爲樂吳人繪圖以記如華卒麟敝衣裹糧奔二千里哭盡哀不告而去

李世竑字廣菴邑大赤鄉人父燦中天啟丁卯鄉試世

漢川縣志

卷十六

列傳上

仕績

二十四

竑由雲夢籍順治己亥進士官旌德縣知縣才識敏練讞獄精詳旌邑舊有編審陋規費餽令長世竑獨不受存爲公用旌人樂其惠政纂入名宦傳遷瓜州同知卒張宏傑字特人以舉人官中書黔撫請發幹員外補大定同知管知府事捐貲贖還難婦數人大定欠秋糧一萬有奇草萊於兵燹無徵者十九力請蠲除烏蒙苗婦倡難開誠撫綏終宏傑任不敢逞升貴陽知府起補金華振興人文整飭凋敝久之謝病歸

龍待字需五納銘長子順治五年拔貢由教習考授武陟縣令歷官三載剔積弊定賦額嚴保甲禁刁訟修木

蘭橋以利涉築黃河隄以防水民賴以甦旋擢主事轉吏科給事中循聲屢著未幾卒於官

王希洪字幼毅號槐墀學有淵源不事浮靡康熙癸巳進士明敏廉幹爲政有體本家訓以飭吏治由邑令歷郡守所至錚錚有聲不愧操江家風焉

龍德字坤衣號中菴生而穎異性孝友與兄待俱有文名其仕巫山也潔己裕人案無畱牘巫人德之俸滿遷豫章臨江郡丞清署多暇與僚屬賦詩飲酒咸以江州司馬推許之旣以裁缺歸里門惟圖書四壁而已卒年七十有三著有頤園小草載藝文志漢陽王戩誌其墓

漢川縣志

卷十六

列傳上 仕績

二十五

子四長文玉廣通縣知縣從祀鄉賢

黃嗣山字次魯爲人尚行誼不屑以文藝見長由康熙己卯舉人官益陽教諭益俗簡陋值釋奠牲牢多涉率畧嗣山悉心釐正凡簠簋豆籩之屬必虔備精潔肅然如神陟降平日訓迪諸生力持古道多引前言往行相督勉必以躬行實踐爲要嘗曰眞經濟不本理學終非眞經濟豈徒負才氣者足辦天下事耶督學黃鴻中稱曰蘇湖矩範卒年六十有九子三皆諸生

歐陽暹字子晉號晴湄學優性雅有詩名以康熙舉人司訓華陽課士有方於勢利泊如也士林德之所著有

柏悅軒華笈詩草餘載藝文志

歐陽遷字萊常號偃庵暹子也康熙庚午舉人以詩文名於時由廣濟穀城學博令眞陽服官廉幹修學講禮以造士除奸弭盜以安民政治修明卓然稱賢至今眞陽民猶尸祝焉著有四書說畧詩韻說畧醫學大成一嘯草薈藂吟諸書

歐陽淳秀小里潭人康熙丁酉舉人暹之孫庚午舉人遷第三子也丁酉舉於鄉榜姓吳補雲南南安州硿嘉判官硿故邊徼地漢苗雜處號難治秀百計撫綏政皆有績硿人頌之其詞曰鹽鹽陽公令聞不已待士如賓

漢川縣志

卷十六

列傳上 仕績

二十六

愛民如子自公之來百廢俱舉文宮首創城郭兼理保障一新風化伊始道路胥平廣濟鹽米壘市無欺漢夷皆喜改達棲流整修寺宇勞心四年沛恩百里廉明仁恕美不勝紀飄然北去歌思胡底比行遮畱弗克相率勒之於碑以誌遺愛貢士黃士簡作詩紀之歷任山東禹城平原知縣循良聲日起年逾七十卒

段穎聰字達四號存愚性質樸課生徒莊嚴不苟動必以禮康熙甲午舉人雍正丁未成進士除刑部主事供職勤敏案無畱牘人莫敢干以私其歸也囊篋蕭然張孚先字宗周康熙戊寅由歲貢任武昌縣學官善於

訓迪受其造就者不少武邑學額舊止十五名孚先請
廣學額遂得增至二十名永爲功令武人士懷之纂入
名宦傳

馮臣烈字存齋周陂鄉人嗜讀書兼精地學早成諸生
食廩餼雍正五年選舉孝廉方正官貴州都勻府獨山
州同十三年乙卯夷苗叛臣烈積粟厲兵爲戰守具部
署井然賊不敢犯遷江西建昌府通判以繼母憂歸行
李蕭然年七十有一卒子五人皆克紹先志孫曾雲仍
遊鄉校有文譽者甚眾

蕭林字庚垣號稚山文沅四子有幹濟才乾隆壬子舉

漢川縣志

卷十六

列傳上

仕績

二十七

鄉試第一出宰山東需次省垣日有濰縣劉某者故家
子也少年佻達以事忤丞丞銜之甚恆逐影尋聲將甘
心焉適劉患狂易遂誣以逆謀守道陳檄林往林察其
詐直之劉某疾亦漸瘳歷任朝城膠州泰安諸州縣聽
斷明允年六十有八卒於官子暄字伯陽道光戊子舉
人數爲庶母所窘暄惟承以敬順士林稱賢未第卒
宋邦英字瑤溪少有文名乾隆癸丑登進士除刑部主
事擢員外郎供職勤敏事無遺誤奏請飭減邑淤陞科
深見嘉納出爲潯州知府明敏廉幹卓有古循良風謝
病歸足不履城郭數年卒於家

林志稿

程廷棟字承梁號松溪乾隆丁巳登進士翰林院庶吉士除戶部主事補刑部主事遇秋審必精心較勘推求至當遷御史轉戶科給事中所上封事多得大體見於施行少好學晚益進嘗謂古人仕不廢學卽片刻餘閑當勿負此光陰奈何效晉人放達爲年未六十有歸田志尋卒於京邸著有居敬堂草墨池紀事詳藝文志

曾海字鵬南號谷亭中乾隆甲子鄉榜任山東博山令多善政有訟其弟盜已財者陰納賄欲置之法海卻之曰以金殺弟何如以金活弟耶其人愧悔去調昌邑令昌北濱海隅時被潮淹海屢請蠲賑民困得甦會有以

漢川縣志

卷十六

列傳上 仕績

二十八

增國稞爲名議修海隄防水者屢控大吏勘修之檄交馳海謂浮土活沙東西七十餘里潮水洶湧去來無時修之難冀保固國稞之增其利小民力之疲其害大持不可而議遂息海素性和易而遇事直行決不依違兩可所至人皆憚之

黃典字玉屋號且亭乾隆癸酉舉人官通山教諭十五載有聲譽升湖南辰州府教授去之日士民皆懷之勒石誌去思焉

秦之柄字謙伯號漢陸誕生之夕贈君夢有人誦繫辭傳曰謙者德之柄也故以名之少穎悟十四入府庠從

其贈君讀如源滋大好學深思嘗暑夜抄書蚊鍼盈背或拂拭之掌爲赤母丁孺人餉以糗糒誤食墨口爲之黔讀書必襲其氣每作文則以一己之精神期與聖賢昭合湖北人文藉甚而邇日深造獨得卓然成一家言者先生稱首焉以乾隆丁丑進士官壺關知縣甫下車陋規悉鐫去恭儉以持己勤慎以蒞民惠而威明而恕閱數年民興官相習如家人父子稱之曰老家長山西協濟軍需銀會事竣以贏餘退還各縣尙巨萬飭按戶給還富民欲藉此報德先生笑卻之大吏委同知劉木來查戲云有處脂膏而不潤者乎先生正色曰亦有入

漢川縣志

卷十六

列傳上

仕績

二十九

污泥而不染者甲午科充山西同考官得士爲盛以病去官民爲立生祠至今尸祝大興朱文正贈詩云前輩典型書卷氣秀才風味菜羹香時以爲知言歸田後別號遂農老人人稱其里居爲遂農庄優游林下二十二年卒年八十有三所著延曜堂詩文集春秋說畧廿三史評遂農雜記秦氏家訓卒後其子孫陸續付梓行於

世壺關縣志

程廷棻字敬軒乾隆戊午與兄廷楫同舉於鄉以壬戌明通榜任松滋教諭擢福建連江令郭南有玉華洞爲逋盜藪棻至修葺除其榛莽盜無潛跡連有盜首楊八

陳聯科者久爲沿海患有司莫可誰何棧募壯健計擒之羣盜屏迹已調福清福清地近海民倚煮鹽爲業羣商籲大令禁之棧謂窮民倚此爲命禁之急且生變力請得免後以事窒誤議鑄一官百姓如失慈父母臨發攀舟泣送者一二日不絕棧學問淹博工詩解組歸有陶潛栗里之風以子煜官閩中欣然就養數爲武彝之遊刻詩巖間卒年六十有四兄廷楫官黃安縣教諭課士有方

李詮字登三好讀書有幹濟才性耿介不妄交遇知名士輒獎勵不衰初授安吉州判分駐梅溪民以捕魚自

活而漁舟出沒太湖中往往哨聚殺人詮設總甲編船戶梳奸剔弊境內肅然歷任處州永豐鄞縣事皆有政聲處州民自宋元時生子權稅苦其征者溺斃之詮亟請罷去處民至今歌其德暇則弔古覽勝繕葺半月泉鶯花亭故址慨然想見元明諸名賢創建括蒼東莢書院以造士則有孫蘭韓筠沈焯出其門又日與二三朋好賦詩談棋縱飲湖山間有吏隱風遊東西浙者咸歎錢主敬陸鳧川諸先輩復起也鄞縣甯波巖邑俗健訟詮誅首惡一二人刁風乃息同官有吏才者皆稱其能乾隆三十三年秋協濟雲南軍餉加軍功轉嘉松運判

以事謫德清主簿自號九品漁官詮喜元白詩語質情
深工書摹來禽十七帖遒勁有法歷官二十一年以疾
歸卒年五十有九嘗謂其子蟠曰吾爲廉吏貽爾以清
白足矣乃知蟠詩酒自高窮而不悔者皆乃父教也

劉世棟字若木乾隆庚寅舉人初署河南息縣事息於
光州諸屬縣最稱難治棟開誠待之咸向化繼補商水
值歲飢賑貸有法全活甚眾官商水八年以卓異升貴
州正安知州正安在萬山中苗民錯處獷狎難馴有南
大呂者方聚眾抄掠兵役過其地輒支解之棟至設方
畧擒大呂治如律羣苗驚以爲神乃因其俗定爲婚嫁
喪祭之儀又進其耆老秀士爲言年穀順成室家相保
之樂而刑罰死喪之可畏使各歸讀法於鄉期年正安
大治升奉天府治中旋升山東濱樂運同年七十有八
卒棟生有夙慧五歲背誦王勃滕王閣序終篇不遺一
字旣長旁通天文推步勾股之學以至內經本草靡不
究心公餘按脈定方日以百計而不言倦此又前古循
吏所未有也

羅正墀字蓮舫卓有學行少受業李仲三林鏡湖之門
皆器重之中乾隆辛卯鄉榜壬辰成進士除主事歷官
員外郎監察御史刑科給事中門無私謁戊午授河南

彰衛懷兵備道適南岸睢工漫潰督辦堵合事宜備歷勤勞工竣獎叙有加焉明年辦理北岸隄工凡沁河彰河衛河丹河濟運水利在在喫緊正墀規畫周詳三汛慶安瀾武陟城南十餘里舊有民修攔黃埝汛至苦漫潰呼號轉徙不忍聞見正墀先歷災區撥船隻散餅餌金活無算復查勘形勢捐廉購料加築護城隄高厚堅實數十年無漫溢之患其加惠士林也修葺河北書院延名宿籌修脯厚膏火五六年間裁成幾二百人丙寅免繼母喪除河陝汝道歷署按察布政使事值秋審持法尤慎而根於誠恕不肯輕事箠楚無冤濫者以河防積勞成疾或勸以稍休正墀曰案牘二百餘起數百人之生死出入繫之敢自逸也爲人識量沉毅居恆罕疾言遽色自京秩至外任四十餘年靡不實心以行實政故所至莫不悅服年六十有四卒於官以核減籍其家子秉寅直隸廣平府同知

秦敦承字任宣號曉山稟乃父漢陸家學官湖南隨地

著循聲祁陽僧誤服蛇菌死前令以寺僧某擬抵承至爲剖其冤道州大猾聚眾掠承力捕知州某以意入者數人爭之三易案牘始得釋其官永州同知也鄉民每值上元各率其屬以磚石互擊謂之驅疫至斃不言以

爲常承力革之俗爲之變其官常德同知也知府某家
奴擊應試童子腦破裂眾怒闕府門武陵知縣馳往羣
相謾罵承搥府門入索奴出大杖之眾歡呼解去乙卯
歲辰苗蠹動奉檄協濟常德軍局諸弁頗需索承一以
禮諭之無喧爭者已而提舉辰州軍局之檄至承沒已
三日矣承清羸平居恂恂無以勝於人臨大事決大疑
奮發無前具兼人概坐是遭同列忌沮抑之不得伸然
宦轍廿餘年遍三湘五嶺間謳歌者眾可觀其經濟之
所抒矣

東川文集

張大鳴字仿歧邑之雞鳴鄉人由廩貢司訓鄖西能以

漢川縣志

卷十六

列傳上 仕績

三十三

身爲教士林頌之喜裁成寒峻鄖西有葉生者早失怙
瑩瑩孑立以貧窘曾不得一日就外傅而問學焉大鳴
召致之飲食教誨時周恤其寡母葉卒成名後葉官沔
陽訓導造其廬而大鳴之卒也久矣每歲虔具酒醴泣
奠於其墓云

程煜字暘川由貢生議叙按經歷任閩蜀遞擢知縣同
知有能聲嘉慶初黔楚苗變委辦隨營事務經福督康
安奏升鎮遠知府以趲運軍需妥速 賞戴花翎調補
貴陽知府伊桑阿之勒幫也煜亦被罣誤黔督奉 旨
有素聞其平日官聲甚好着琅玕據實具奏覈奪旋經

查明出具程煜爲人老成勤敏廉幹聽斷公允且辦事認真民情尚屬愛戴考語起補某州知州未之任卒當時惜之著有種榕堂集載藝文志

林志稿

林祥紱字穆堂號軒臣諸生鍾璠子進士德明孫乾隆壬子舉於鄉嘉慶己巳以進士揀發河南卽用知縣承凋敝之後需次七載熟悉地方情形蓄積已久任泌陽確山勤敏廉幹治績懋著姚方伯祖同倚以爲重陳時弊數事方伯嘆曰經濟學問若林令者眞今之賈長沙也檄各郡邑行之聲稱藉甚繼調靈寶皆卓有循良聲授延津自知耿介不合時宜乃曰仕不知止後悔及之

漢川縣志

卷十六

列傳上 仕績

三十四

矣遂謝歸祥紱學有根柢初館京邸教授數年出其門下者范編修承典范主事承祖賈相國楨蔣閣學立鏞稱名臣碩輔著有條陳河南利弊西溪文抄吳畝行於世詳藝文志卒年六十有六子二長以棟字樹廷諸生孝友謙沖謹飭儉素士林敬愛次以樽皆不愧清白吏哲嗣俱卒

劉珊字介純號海樹世棟孫穎異博學幼讀楚詞文選及六朝文好爲齊梁駢儷之作學使茹古香異之籍諸生嘉慶甲子舉於鄉辛未由進士分發安徽令天長調合肥大府器其勤能以卓異薦升泗州牧地多水患前

牧請挑濬濰河冀水有容累假帑至七萬三千有奇每年攤入地丁徵納名曰河帑泗民未享濬河之利已受帶徵之累珊力爲申請得免旋署知潁州府事會有河南教匪邢名章者倡亂於阜陽勢頗猖獗屬邑幾不能爲捍禦計珊部署兵勇冒雨馳至岳家莊相地勢秘授計縛名章妻子及其餘黨以歸事聞 賜花翎授廬州知府未蒞任卒珊生平負才不羈詩歌豪宕居官十數載能以禮士愛民興利除弊爲急其卒也年甫四十六著有亦政堂詩鈔續集委蛇雜俎各若干卷行世載著錄志

秦敦原字逢資號襄坡嘉慶甲子舉人丁丑登進士初任河南南召知縣剔奸弭盜振興書院不遺餘力不次採訪節孝取沈淪之幽光大爲表揚之在任八年風教丕變以卓異調滑縣南召民餞送者多至泣下滑地平曠恆苦旱當李逆作亂之餘瘡痍未復百廢未舉原甫下車建龍神祠創試館爲教養地舊有太行隄以捍瀆水適值淫雨潰決原割廉俸五百金搶築完固於是轉歉爲豐道光辛丑祥符河決大府派買楛料三百槩吏白當派之於民原憮然曰民堪此累乎乃平價購買工濟而民不擾墊賠甚鉅事竣晉知州銜迨咸豐九年原

去官既十餘年矣滑民思之猶勒石以誌治行云生平
謹厚純樸學問兼優道光甲午乙未庚子三充房考官
榜首皆出其門相繼成進士士林傳爲盛事著有四書
註說樹百山房集客遊詩草年八十有三卒子孫多業
儒孫本峻本先皆庠生
喻文珍又名松鈺嘉慶癸酉舉人性孝友家貧授徒自
給館穀所入常分給諸弟不自私焉生平曠達榮辱不
以介懷官宜昌東湖教諭兼署長陽代理宜昌府學凡
諸生之貧者時捐俸以勵造就卒年六十有六諸生廷
鑾其孫也

漢川縣志

卷十六

列傳上

仕績

三十六

周鏞字序東沈靜嗜學遇事警敏登嘉慶庚午鄉榜道
光壬午進士官浙江上虞令剔奸弭盜聽斷明允爲民
興水利置社倉聚諸生講習拔其尤者育之書院一時
文風丕振虞有地曰嚴家嶼濱海諸不逞嘯聚深箐中
久爲境內害鏞設法捕治之民大悅釀金卽其地肖像
生祀焉乙酉分校棘闈得士稱盛調補山陰除大猾決
疑獄任事六年山陰人祠祀之如上虞以父憂歸主講
紫陽書院十餘年取林莘田林賓門周雲門輩志稿互
叅未竟卒年七十有五有都門遊草洗桐山館詩文稿
藏於家

秦篤慶字季 號雲皆之柄孫九歲能文就童子試爲
有司所器重弱冠食餼由廩貢授訓導初署江陵奉檄
督修隄工稱鞏 荆州府教授會有革書散布蜚
語學校士子被誣者三十餘人幾構大獄篤慶廉得其
情以計獲正犯白大府置之法士子冤立雪同聲感戴
署荆門學正歲大旱禱雨輒應道光辛卯司訓京山甫
兩月以疾卒生平能醫全活甚眾著有學校通考名醫
列傳詳藝文志子二本熾本疇熾增生

林鍾俊字升甫號賓門質魯好學爲人和易簡默與物
無忤嘉慶壬申貢成均道光乙未司訓鶴峯州鶴鄂邊

漢川縣志

卷十六

列傳上 仕績

三十七

鄙也凋敝距郡遠試例輪值隆冬山徑嵯峨險巘士子
因貧病窘旅費欠考四次干褻革者尤多俊甫至歷陳
學使得破例寬免者二十八人居官九載以振興學
校培養人材爲務由是感德教者興思弗置云歸取兄
鍾任舊纂縣志遺稿重加考覈手自校錄方思輯爲成
書齋志以沒壽八十有六有印心書屋詩文集

何源字鏡芝中道光己酉拔貢以 廷試第一分工部
小京官倜儻有謀畧曾文正國藩嘗召而致之幕下從
征東南負嵎之寇策籌載守多中機宜咸豐四年冬九
江水師潰當是時髮賊乘間分股上竄蔓延鄂疆披猖

極矣胡文忠林翼統軍圍攻年餘不能下乞師於文正文正駐旅九江急圖恢復江南欲弗許源曰東南形勢重在武昌鄂疆不復則下游弗靖東南未可圖也乃分羅李兩軍力爭上游而鄂疆諸府州縣始次第復已而走江西克饒州保升員外郎入都補刑部四川司旋理刑熱河熱河本磽确地民鮮蓋藏恆廣蓄驟馬租給商賈取其息以爲常而騎馬賊遂贖貸以資劫掠受其毒者不分良莠控告株連構興大獄源廉得其狀悉心剖析勿稍枉縱熱河人咸德之源磊落勤敏公餘惟讀書作字尤工楷仕至郎中方期大竟其用年逾強仕遂卒

漢川縣志

卷十六

列傳上

仕績

三八

孝友

明

陳迪字惠吉永樂庚子舉人性孝友好施與以母老不求仕進作南陔賦以見志家不甚饒而喜急人困士林誦之

張近軒字驥臣宏治間諸生質直好學以親老隱於市篤志奉養猶讀書交友不怠人稱孝友既卒尹應元題其墓

劉泰永字百年一字楚昇漢璧長子孝友篤誠不慕榮利少爲張甌山先生所稱許隨父入都路遇緹騎簇擁

一檻車詢知爲顯者喟然曰陶彭澤豈及此乎力勸父解組未幾漢璧卒扶襯歸徒步二千餘里徙居鄉野教授友愛兩弟甚篤

府陶志

熊開泰字舒安邑庠生天性純孝父兆臥疾泰割腕肉啖之而起里人重之

王文貴洪武時由江西吉水縣徙居邑之雞鳴鄉彭公坑遂籍而貫焉爲人醇謹老成處己最約嘗語其子孫曰人能喫虧便是英雄居家有禮法子二長曰興一次曰興四女二一字余文儀一字李華皆贅於其家文貴一訓以勤儉敦睦垂立家範子孫歡聚世篤孝友七世

漢川縣志

卷十六

列傳上

孝友

三十九

同居三百年里人稱爲義門今別籍久矣三姓子孫猶親睦不渝云

李雄邑十八里官坑人興弟茂相友愛貲產頗饒雄子一茂子六方析居雄品處七分茂以二分請雄曰姪猶子也何歧爲卒七分分之

何源恆字立方性篤孝二親亡俱廬墓終制幼聘妻瞽不毀前盟及妻死誓不再婚當事旌之

張俊字秀升天性篤孝里黨無間言以歲貢歷任沅陵均州學正課士有方士風丕變

岳之屏字藩甫庠生事母歐陽氏必誠必敬母病齋戒

顓天乞以身代感格果愈教兩弟及子孫皆成名

王遴由明經歷官教授少有至性以母老恬於進取致仕歸色養備至萬曆二十年中丞採訪篤行旌其門

張績甌山緒之弟爲諸生列高第時稱張季子以貢入京廷試第一耿尚書定向勸入國學謝曰吾兄衰老平生甘苦節吾欲亟受一官資祿以養遂謝去銓次方及而卒定向爲作天問詞以弔之其詞甚哀

府志

黃溥字中宏諸生邑之皂港人家素豐周急濟危無倦色父朝宣病甚醫告術窮溥祈神願以身代詣武當山匍匐禮神哀籲呼號人不忍見忽聞空中有鞭擊聲聞

漢川縣志

卷十六

列傳上 孝友

四十

神人自稱王姓語曰若欲父愈岩中不二長老可使也溥訪其處見洞中一叟龐眉修偉手攜銅題擊左右石壁鏗然響達緩步而出侍者前導起視溥目光閃灼如電徐曰爾乃漢川黃孝子耶若父數定吾豈能違天惟若丹衷激切吾姑視之因偕往水程千數百里不三日抵舍一劑而安叟畱其家溥率家人朝夕朝拜越一年父疾復作叟令溥入問狀及出叟失所在惟畱隻履可容斗米父遂卒人驚爲神仙溥居喪哀毀廬墓獨居里中稱爲黃孝子云子正芳諸生孫焜中順治甲午武舉乙未成進士官衛守備

林智字濬哲增生性質直課生徒莊嚴不苟動必以禮
母病奉湯藥衣不解帶者月餘迨卒不茹葷不飲酒蓄
髮廬墓三年父憂亦如之著有潛穎集卒年五十有二

林志
稿

國朝

趙日榮事母至孝賊張獻忠至獨負其母逃妻子皆被
害母年九十有七始卒日榮哀毀骨立人稱純孝

湯大廉字頑夫廩生性至孝父没大廉擗踊絕而復甦
勺水不入口者三日母強起之乃勉進糜粥哀號喪次
足不入內庭口不言外事及父塋斬衰草履匍匐三百
里泣不絕聲道路惻然雍正中旌

漢川縣志

卷十六

列傳上 孝友

四十一

林承露字漢莖號也是學博若偉次子自少穎異過人
耽經史通雜學爲諸生四十年足不涉訟庭名不入公
門士林交推重之孝友天成同懷昆仲四人晚謀析居
以良田美宅予弟兄而已獨受其汗下者嘗以墓田若
干畝爲諸姪紙筆之資夙夜督課多成名焉繼室彭氏
以苦節著家聲賴以不墜

蕭時英字樂三父興國字閏美順治丙戌舉人歷順德
府丞有賢聲父没弟文池爲人誣時英破產雪其冤又
割己私田贍之已而諸兄弟相繼卒時英一身支持家

政遂無心仕進家素豐勇於爲義雍正間疊遭大水皖隄沖潰時英承役完修皖民賴之居家甚敬黎明卽起雖獨坐必整衣冠盛暑不袒裸出入必告其先自奉儉約戚族有貧乏者竭力周之人稱長者子三人長光祚生文沅

蕭文沅字芷南國學生年十二應童子試卽知名以父母多疾精求醫理躬親湯藥父母皆享遐年外人有求治者沉疴立起每歲捐貲製藥餌以濟貧乏閭里賴以全生者凡數百人家素豐裕親舊積貸至數千金不存券記曰恐子孫貧爲人累也居家儉樸親友往來必情

漢川縣志

卷十六

列傳上 孝友

四十二

文周至族中惡少年或羣起詆侮文沅善遇之其人感悟卒爲善良性嗜讀書族有聰穎子弟貧不能卒業文沅教誨飲食孜孜不倦有妹適陳氏早寡無子病甚文沅迎養於家陳族且以爲不起也瓜分其產及病愈文沅屬其弗理已贍之終其身僕婢役久聽其自去不計券直晚歲家貧節儉自持而義利之辨甚嚴訓諸子曰吾家屢世豐足物聚則散理之常也惟忠厚之道詩書之澤不可替爾有子六第四子林乾隆壬子鄉試第一

章學誠
省志稿

劉峒有至行寒夜父病痢峒嘗便溺夜半澣垢衣父尋

瘳章學誠省志稿

周有朋邑梅城鄉人勤苦起家幼孤與弟有明友愛最篤有明孱弱而善病有朋誠毋過勞絕不以家事累凡內外經理有朋悉獨任焉數十年間遂以大饒尺帛斗粟無所私晚年將析箸有朋以二分分之有明請於兄曰吾兄弟如一身姪猶子也兄子六弟子二吾誠不欲使二人均六人業曷八分之有朋不可有明請益堅聚親族故舊贊成之卒如有明志今子孫繁盛孝友雍睦之遺猶世守弗替云

林惟華字祝三居邑梅城鄉泂山下至性過人母早逝

漢川縣志

卷十六

列傳上 孝友

四十三

每家祭輒嗚咽流涕侍父疾衣不解帶者六月訓子最嚴雍正丙戌歲售田若干畝命諸子負笈從師期以遠到好文史手自抄錄校定盈箱篋暇則蒔花釣魚攜諸孫遨遊泉石以自樂卒年七十有五子三德明成進士岳恆瞻字西禮事母至孝母尋病醫藥不效日益篤恆瞻憂之乃割股以療輒愈年五十餘色養不衰

李承脈字

居臨蓮子湖先世儒術代傳父祖述字

紹五能文章勇於爲善承脈幼承家學博聞強識以務本爲先早知名行誼卓然最爲士林所敬愛父卒築室於墓側三年絕不聞家人事母喪亦如之稱李孝子

林德明字二如號鏡湖乾隆癸未進士著有鏡湖文集未仕卒德明幼穎悟爲文出入經史裁成後學能各盡其長里黨遊庠序登賢書者往往出其門下性和平於人無所忤然不可干以私以此多不諧流俗士林益推重之德明篤於孝友父逝侍母姚色養備至年八十有六先德明四月卒德明病罔中涕呼尋母如嬰兒聞者莫不泣下待昆弟友愛一食之甘必招與共於族眾無不睦叔耐閒任族事爲眾推一月兩課族子弟續修林氏譜皆資德明商確生平行務篤實學復淹雅訓人尤得循循之理具詳羅正墀傳中羅蓋親承其教者卒年

漢川縣志

卷十六

列傳上 孝友

四十四

五十有九以孫祥紱由進士官知縣追贈如制

章學誠省志稿

周應運字簡之乾隆時諸生性至孝七歲時偶忤兄母不懌運長跪母榻前請罪母顏霽乃起長侍父病衣不解帶者月餘性不喜隨俗兩薦不售遂杜門卻掃篤志著述歲歉飢寒讀書吟哦以自樂著有停雲山房文稿排悶詩草秦漢文選子書纂要唐詩摘珠蘇詩摘選卒年八十

孫鳳質居周陂鄉家赤貧縫紉自給事親孝親沒朝夕上食如生時守殯柩三年不忍暫去後卒

陳其廉字思伯邑南湖垸人愿樸沉摯幼孤力田致富

與兄其廩其庾弟其厦同居數十年和樂無間言析居無私積遠近稱孝友性耿直好慷慨周急人建宗祠擴祭田施義塚建橋梁皆慨然爲之卒年七十有七子虞曙貢生

成大勇諸生孝友疎財建祠睦族遠近稱之同里有胡家健者事節母亦以孝聞

龍元位村農也貧而鰥有孝行母老而善病元位扶持奉養傭工以供母饘粥每晨夕必歸省侍母左右凡飲食寢處咸極其誠敬十餘年不稍倦母死蓄髮三年

尹文德邑南湖坑村氓也有孝行母患頸癰膿血潰爛

漢川縣志

卷十六

列傳上

孝友

四十五

文德曰敗膿在中寢蝕旁肉若扞拭則不堪痛楚乃俟其熟寐潛吮數次而愈

彭光字仲輝邑彭公坑人敦善不怠有子四人長良詠次良諄三良諼四良詭皆篤孝義子孫百餘口五世同居一門之內不有私財雍睦整肅藹然有古遺風焉邑令卓振清匾其門曰孝友傳家

祁上進字特賢天性孝友與兄上達析居後讓居於兄父母養塋皆竭誠盡禮獨任之兄沒教育孤姪不異所生中年饒於財慷慨多義行周士之乏濟人於飢寒以及橋梁道路皆能出己財以利益於眾而一念孝思老

而彌篤凡歲時伏臘追憶二親輒泫然流涕也晚年建祖祠修宗譜捐祭田至今人猶稱道之卒年八十有二子三楷廩生孫曾多列膠庠有舉鄉榜登仕版者祁氏譜稿陳虞曙字迪光號晴舫歲貢生質直好學內行純篤父其廉年邁有足疾虞曙扶掖就養無寒暑間居恆自奮思立身顯名以光益所生父母恆顧而樂之時獲甘旨新異必不先嘗戚舊有喜慶事則述以承歡否則戒家人無與聞慮父母之感傷也晚修宗譜擴祭產凡義所當爲者以身先之族黨稱儀型焉年八十有五卒子登第歲貢生孫繩祖諸生

曹海字天柱號沐亭生有至性長事親益切愛敬母氏姚臥病海扶持左右衣不解帶者年餘比沒廬居墓側三年繼母性嚴急海順志承顏能得其歡父與繼母先後逝再築室墓次親友寬譬勸慰乃歸時有烏鳥相隨翔集人稱其異凡值其先人生日諱日治杯茗酒醴薦其所嗜哀慕之誠終其身以爲常道光十二年鄉人士白於有司獎之

秦敦仁字似山進士之柄長子也父官山西壺關令稱清廉吏室鮮蓋藏敦仁慎守先訓能勤且儉無鉅細皆歷歷舉其事無失生平好學篤於孝友待子姪無異視

然時或不免於讒間逢堂上怒尤積誠博歡底於怡悅而後卽安雖年逾四十常循循幼儀也蓋讀書識大體如此年四十有八卒子四篤緒篤祜篤烈皆諸生以篤慶官京山訓導贈修職郎孫七人列庠序者本端本英本熾曾元以下皆世其儒術

秦氏譜稿

陳相海諸生孝行推於鄉里母患癰疽相海頻吸其膿母遂痊愈

章學誠省志稿

馮源字楫川邑張池口人讀書能文當時諸名宿雅器之然數奇不偶遂棄帖括工吟咏天性純厚事父母能得其歡與仲弟沛季弟卜渭雍睦懽愉白首無間嘉慶

漢川縣志

卷十六

列傳上 孝友

四十七

丙辰歲大飢里中多賴以舉火全活者眾有貧不能娶者輒助之人稱隱德年六十餘卒以沛就職通判封如制

林氏諱鍾佐字琴台號惺齋軀幹雄偉目奕奕聲息洪亮常據經典以處是非先事論成敗懸策而驗者十居七八少與兄鍾藻字鑑塘篤志典籍傷兄積學早逝乃以例入貢公父母律子嚴峻公兄卒懊惱愈甚公承歡色養恆得之形聲之表雖年逾五十而詳慎敬順循循然若成童時致堂上怡悅忘西河嘆者蓋天性然也居平恭儉好禮處己最約嘗助人婚葬謀人生全築隄防

免逋負散粟捐金則汲汲如恐弗逮或緣以腴田券進者益給貲而反其券道光辛壬間飢會賑恤方逮當事主粥賑專廠於城公慨然曰四境寫遠以瀕死飢軀匍匐往而就食非法也移賑歸隄工不兩相濟乎助賑八百緡議以工代或聞於上官報可踵而行之者存活益不可勝計公世多令德爲人敦睦磊落無城府素負物望遠近有紛爭肝胆相示多感服而化其卒也年六十有五閭里哀慕不忘歲具酒醴隻雞羅拜於其墓族人卜芝紀之言行載林氏宗譜以子祥瑗司鐸鄖西贈如制晉奉政大夫季子祥璵英俊嗜學早卒

天門甘方娘

漢川縣志

卷十六

列傳上 孝友

四十八

何作柱字砥齋增貢生生有至性讀書多穎悟少從邑中周學博士望遊能文章然數不得志於有司家居慷慨尚義鄰里困乏多所飲助嘗焚負券二千金無吝色早失怙恃鮮兄弟叔母氏段嫠而獨作柱曰吾爲猶子獨弗能盡吾職乎遂篤志奉事生則曲盡其養其送死也棺柩絞衾罔弗誠信於是人幾不知其有母且幾忘段氏之無子年逾七十卒

張萬德有孝行父宗華瞽萬德朝夕齋戒叩禱輒有光母氏何復患心痛醫人咸卻走萬德夜於庭中稽顙祈福弗瘳乃以利刃割股作羹以進有頃母起坐啜粥旬

日飲食如平時人皆憫其誠孝所致年八十有三無疾而逝

龍述楚國學生幼孤事母陳愛敬不稍懈母當衰年邁噎疾百計療之罔效將弗起也述楚忽謂母曰吾乃得秘藥矣跪奉母前一啖而盡惘惘中若有人告者知所啖乃子之臂肉也疾起拊而痛之述楚恐重傷母心惟謾語笑之而已越日母飲食起居一似未嘗病者卒年七十有九

劉定柏字松亭邑彭公垵人篤志事親母氏吳病危且殆醫者錯愕曰是顧安所得藥定柏憂瘁不知所爲泣

漢川縣志

卷十六

列傳上 孝友

四十九

跪虔禱於神明惟晝夜省視衣不解帶數日間母沉疴竟起或以報醫者醫者復錯愕曰吁豈有返魂香耶顧安所得活一日家人伺其左臂有大創未合始知定柏割股矣越三年母無疾而卒定柏年逾四十亦卒

林鍾傑字企三國學生愷悌寬和能任大事父肫伯耽心圖史不問家人生業巨細悉委之傑租息出入會計一主以光明終其身不聞有毫髮私故諸兄弟舉科名登仕版一志進取無家計累者傑之力也生平居家親睦處世簡易謹身節用傑兄弟恆舉以爲子孫法年六十有八卒子祥玟早卒子婦馮以節稱孫以鎧諸生

周士顯字復旦居邑之阿婆山號在阿籍諸生言動不苟遠近無賢愚皆推爲老成典型少孤性篤摯事節母以純孝稱刻意問學思以光益所生然不中有司法程省闈輒北益自攻苦淬厲每夜分不寐發憤歌呼或至泣數行下傷無以慰親心也卒年七十餘子業晉諸生劉賢佑字白天號輔臣優廩生性恬靜言行和謹遇有疑難不張皇而事立辦事親孝嘗侍父疾不離左右者年餘號泣禱神求以身代父没事母益先意承志歷久不懈處兄弟之間曲盡友愛尤足博堂上歡祖祠將圯商諸兄弟捐貲重建以重根本鄉人士將具其行實請

漢川縣志

卷十六

列傳上 孝友

五十

旌孝友固謝卻之年五十卒子二長崇斌候選訓導

王德本國學生少孤鮮兄弟視親從兄弟子若同胞捐貲讓產稱友愛者歷久無間言子尚志監生性剛正尤以孝友聞

陳一禹字夢熊生平多義舉天性肫摯有孝行事母尤篤有司獎之

張應鍾邑大赤鄉村民也父早喪家無宿糧傭工養母出入必面每晚必親理牀褥滌穢器母病久夏暑間祛蠅蚊侍湯藥維謹同治甲子冬村中火會鍾傭於外驚見之急奔歸火已及舍徧尋母不得倉皇號咷沖入烈

焰中救母火益烈不得出遂俱焚死移時眾臨觀輿除瓦石得其母子尸已焦鍾猶負母於背云里人哀之買棺瘞其殘骸焉

秦篤訓字璧軒少穎異讀書日數行下弱冠入郡庠從陳愚谷詩遊甚器重之暑月嘗侍父疾足不出寢門研究醫經奉藥餌汗雨蚊雷凡數閱月父疾得瘳以明經就廣文授徒多所成就弟篤新官河南稱循吏友教之力最多年七十有五卒著有重論山房詩文集射正求的醫案四卷子三本發縣丞孫業精拔貢業灝諸生

秦氏

稿譜

漢川縣志

卷十六

列傳上 孝友

五十一

向慕鴻一名謨鴻字遵美居六湖垸天性肫摯篤於孝友母患痢疾謨鴻躬湯藥浣廁踰夜不就寢病劇竊嘗母糞溺以覘安危吉凶比沒謨鴻負土封墳結廬其側旦夕哀號酸感行路年逾五十卒

余澤字雨田以貢生候選教諭質魯好學內行敦篤早失恃事繼母益謹兄弟之間怡怡如也邑令王嘗顏其居曰孝友堂生平言矩行規與物無所忤人咸敬憚之中年教授鄉里因材施教修脯厚薄弗計也裁成甚眾年 十卒

黃憲元以字行少失怙貧窶無人狀歲值大禋母氏再

適越數年母復無以自存憲元迎歸傭耕以養每飯恆不敢飽輒蓄以遺母主人憐其志時加賙恤焉如是者有年母染毒瘡膿血穢惡醫者謂不治憲元勤浣濯調護三四年無寒暑間母漸瘳憲元卒年五十餘

雷世彰監生居邑梅城三里自高祖儀麟至其身五世同居外內雍睦道光七年王學使贈芳獎以陳鄭遺風額

宋齡又名松芳邑之劉家壩人浙江定海知縣德潤之孫諸生紹瑄次子性肫摯篤於骨肉咸豐乙卯與兄械芳避亂至雲夢境聶家橋中途遇賊相距不數十武械

漢川縣志

卷十六

列傳上 孝友

五十二

芳促齡走匿賊掩至脅械芳從械芳不可賊迫以刃齡從稻叢中出曰家有老母賴兄奉養兄妻子皆少兄死朝夕無託願受刃貸兄死賊拔刀殺械芳齡大呼且罵以身扞之遂並殺時齡纔十七歲

羅亮侯字秋鑑幼失怙恃事兄寅侯以恭順聞兄病恆祈禱願以身代事無大小必諮兄而後行旣析居舉田宅之便利者讓於兄年七十有三卒同治四年旌祀孝悌祠子奎璧候選訓導孫嗣輝曦林皆諸生

張成棠字南村廩生樸誠和易篤於孝友早失怙母氏督責甚嚴成棠委婉順承終其身以爲常兄弟有過失

母或不悅成棠恆引咎自責焉成童後奉母命析居授徒以資奉養館穀所入必分給兄弟恐貽母憂也年五十餘卒

匡揚曠字 邑梅城鄉人讀書尙行誼敦篤孝友父母愛憐之母許氏遘痢疾經月弗瘳曠割股以進霍然起

黃憲林以字行邑西江亭農家子目不識丁性純篤處家雍睦事親能曲意承志居母喪廬於墓側號慕不已獨居三年年五十餘卒

程福堂字範五母李氏方妊而嫠福堂生恆以不逮父

漢川縣志

卷十六

列傳上 孝友

五十三

養爲恨益攻苦淬厲以慰母志善文辭中道光乙未鄉榜歷署山東知縣事聽斷明允借補臨清直隸州同終知州銜方福堂之甫生也日者皆言歲至三十七當死既長侍母疾經營療治夜嘗四五起弗瘳爲疏告天願減己算以益母壽福堂未嘗言之於人人亦弗之知也有戚黨某生平不妄語者一日死而復甦語人曰昨恍至一第署云程福堂減壽益親出於至誠母壽雖難延孝行當旌增福堂壽十齡其母卒不起後福堂年屆三十七一病幾殆果至四十七而卒子開鏞諸生

馮子樞字南石諸生以團練禦賊功保舉訓導事父出

入必告晨夕定省不懈比沒哀毀踰常事母益篤嘗教讀於外間一日或二三日必歸定省母或有不悅則長跪自責叩頭請罪曰必兒與婦逆也母霽顏引之起乃敢起於先世手澤什襲藏棄或言先人遺事必肅然改容年五十有二卒子尚魁諸生

向志琳字西舫邑長城里人謹厚詳審甘貧嗜學中道光癸卯鄉榜少失怙恃孝事繼母老而彌篤己酉歲大澇家益貧不肯干謁人預外事聚徒教授以養親焉然自食多不飽粗糲免飢而已堂上甘旨未嘗或乏也咸豐丁巳選江陵教諭嘆曰仕非爲貧也顧母年已老勉漢川縣志

卷十六

列傳上 孝友

五十四

丐祿養耳旣之任祇承親歡士子從遊者益眾未幾卒著有葭湄詩草未梓子惇典惇雲皆諸生
呂元炳字貞一諸生居家以禮竭力事親父癖於酒善病往往而劇元炳定省視膳人無間言父卒母雙目盡瞽凡飲食寢處皆精心以承之母竟忘失明之苦年五十有七卒子震亨亦諸生

李精忠字友葵諸生品端學優天性孝友待諸弟至厚課徒數十年學校知名者多出其門士林皆敬服焉年七十餘卒

喻文輝家貧傭工養母母目瞽復患痿痺終年輾轉牀

褥輝扶持左右曲承母志久而弗倦值歲歉自甘飢凍必竭力治甘旨以奉堂上咸豐間四鄉寇聚殘掠突至文輝家文輝不忍捨其母依依膝下賊見之相戒曰是孝子也毋加害卒免於難母壽九十有四而終文輝卒年七十

毛振鷺字伯序家貧苦志力學工詩籍諸生事親以誠父卒以舌舐屍代沐浴既葬哀毀廬墓卒年七十何書洛字錫天邑梅城鄉人內行肫摯父早卒侍母疾嘗減食衣不解結者凡十數月家貧自甘粗糲與弟玉藻相友愛玉藻少不治生書洛躬任家計延師督課俾

漢川縣志

卷十六

列傳上 孝友

五十五

壹志於學時或典田產以備修脯或罄內子簪珥衣飾質金爲膏火試事之需玉藻既成諸生心始稍懌猶時時勉以遠到也有女弟適武生馬興國者早寡無子值歲飢益貧窘書洛逆居於家拮据安業 年既順成始歸遂以節著卒年六十有七子傳典廩生

林其崑字角山郡諸生居趙仙嶺同懷四人崑居長事繼母三十餘年無異所生性吝嗇而篤於友愛將析居以市肆讓於諸弟迨叔季相繼没家日落寡鵠孤雛煢煢孺子立崑委曲安業之束修之饋常恤其諸孤執繼母喪盡哀楸柩絞衾皆獨力營辦未嘗責及諸孤也卒年

五十有六

李元揆字貞一樸愿有內行父母皆享遐齡元揆篤志奉養誠敬不怠稱其孝者無間言善制舉藝從遊者日眾然束脯之入必分潤其兄惟恐其或有乏也於是稱反愛者又無間言以恩貢候選教諭卒

補循良

任宏祥字昌祉山西河津人順治辛卯舉人事母以孝聞

漢川縣志

卷十六

列傳上

五十六

累官漢川知縣武昌裁兵煽變夜駕小舟赴彝陵乞師身任轉餉並請署兵爲前鋒賊望見披靡縛僞官至轅門斬之不安殺一人總兵嚴某口叅帷幄浹江漢悉平士民

立石頌之

事類統編

列傳上終